

四庫全書

集部

欽定四庫全書

集部

唐文粹卷九十八至

詳校官庶吉士臣謝恭銘

助教臣常循覆勘

總校官檢討臣何思鈞

校對官編修臣盧遜

謄錄監生臣婁春坊

欽定四庫全書

唐文粹卷九十五

宋 姚鉉 編

序

戊 總一十四首

著撰十

大統紀序

陳鴻

三傳指要序

劉軻

西漢文類序

柳宗元

樂府古題序

元稹

崇豐二陵集禮後序

柳宗元

元和辨謗畧序

唐次

張隱居莊子指要序

權德輿

注孫子序

杜牧

般若心經贊序

張說

釋宗密禪源諸詮序

裴休

唱和聯題四

荆潭唱和集序

韓愈

聯句詩序

呂溫

宿天長寺上方唱和詩序

崔德輿

愚谿詩序

柳宗元

大統紀序

陳鴻

叙曰臣聞日月星辰紀乎天也山嶽江河紀乎地也歷數正朔紀乎帝也正氣為帝帝天號也統倫羣生冠耀元符牢籠乾坤之精彈壓山川之靈威武薄乎八紘文

明光乎百代功格皇天名在祀典以揖讓而登皇極者  
迺可言矣開歷垂統自始皇焚書為煙燼史官廢紀失  
傳其本後代儒者鑿天地心胸造生人閒見故諸緯書  
及皇甫謐譙周之徒得肆言上古之事恃無可驗競開  
異說臣少學乎史氏志在編年貞元丁酉歲登太常第  
始閒居遂志迺修大紀三十卷正統年代隨甲子紀年  
書事條貫興廢舉王制之大綱天地變裂星辰錯行興  
帝之理亡后之亂畢書之通諷諭明勸戒也七年書始

就故絕筆於元和六年辛卯自太易至太昊年代史傳  
無正說且書皇甫謐似是之言昔太昊氏迎日推策造  
甲子臣以為天地立於水成於氣氣萌萬物昌甲而生  
生主寅帝首太昊歲起撮提故書太昊首甲寅皇甫謐  
云太昊在位一百一十年又云子孫五十九闕傳世五  
萬餘歲又有修飛等九紀亦無定年陶弘景云欲以數  
紀之生求知百代之上誠可笑矣臣非知古者亦不敢  
強為發正自太昊至炎帝世歷無明文存首而已舜行

天子事八十年孔安國注云舜在位五十年三十而徵  
庸三十年在位歷試二年攝位二十八年服堯喪三年  
其一在三十之數為天子五十年凡一百一十二歲崩  
堯帝天下七十載得舜試舜三年一在徵庸正月上日  
受終于文祖二十八載帝乃殂落堯二十八年合入舜  
歷通計在位八十一載堯在位七十二載即舜元年丙  
子帝摯元年乙卯帝嚳元年乙巳顓頊元年丁亥少昊  
元年癸亥黃帝元年癸未炎帝元年癸未以是推之伏



子賤最可憑也諸家年代歷不分出益三年當禹薦益  
於天七年而崩益行天子事三載禹喪畢讓於啟啟賢  
諸侯歸之益避于箕山之陽禹之聖啟之賢益之讓豈  
可廢而不明今以大唐元和六年太歲辛卯上推至炎  
帝元年癸未凡三千六百九年自軒轅至夏殷約世本  
以文宣王太史公堯典舜典商書夏書為實錄周秦以  
降則按本朝國史春秋緯書云炎帝子孫帝臨至帝岡  
又有八代四百餘年據太史公黃帝與炎帝戰于阪泉

之野易稱神農氏沒黃帝堯舜氏作今臣依周易史記以黃帝代炎帝緯命歷叙又稱少昊子孫相承十代四百餘年驗緯書起漢哀平間前代儒者好記異聞新進後學耳目固不可驗皇甫謐劉伯莊皆以舜為戊寅年即位在位二十年遂使神農以來甲子相承錯謬按漢書舜生三十徵庸三十在位五十陟方迺死通服堯喪三年禹崩啟未立使三年何繫今出益三年成禹志且堯禪舜二十八年而崩益行天子事三年為益之事可

也大道之行以天下為家何必私三年於啟或云有窮  
伊尹周公共和如何當夏后相不恢於夏家羿為相臣  
篡相自立后相奔死商丘浞又殺羿自立少康長迺復  
夏政自是之後備見於諸家年厯云

三傳指要序

劉 軻

先儒以春秋之有三傳若天之有三光然則春秋蓋  
聖人之文乎聖人之文天也天其少變乎故詩有變風  
易有變體春秋有變例變之為義也非介然溫習之所

至蹟乎其粹者也。軻常病先儒各固所習，互相矛盾，學者準裁無所，豈先聖後經以闢後生者邪？抑守文持論，敗潰失據者之過邪？次又病今之學者涉流而迷源，捨經以習傳，撫直言而不知其所以言，此所謂去經緯而從組纈者矣。既傳生於經，亦所以緯於經也。三家者蓋同門而異戶，庸得不要其終以會其歸乎？愚誠顓蒙，敢會三家必當之言，列於經下，撰成十五卷，目之曰三傳指要。冀始涉者開卷有以見聖賢之心，焉俾左氏富而

不誣公羊裁而不俗穀梁清而不短幸是非殆乎息矣  
庶儒道君子有以相期於孔氏之門

西漢文類序

柳宗元

左右史混久矣言事駁亂尚書春秋之旨不立自左丘  
明傳孔氏太史公述歷古今史記迄于今交錯相糾莫  
能離其說獨左氏國語紀言不參於事戰國策春秋後  
語頗本古史尚書之制然無古聖人蔚然之道大抵促  
數耗矣而後之文者寵之文之近古而尤壯麗莫若漢

之西京班固書傳之吾嘗病其畔散不屬無以考其變  
欲采比義會年長疾作驚墮日甚未能勝也幸吾弟宗  
直愛古書樂而成之搜討礫裂据撫融結離而同之與  
類推移不易時而咸得從其條貫森然炳然若開羣玉  
之府指揮聯累圭璋琮璜之狀各有列位不失其序雖  
第其價可也以文觀之則賦頌詩歌書奏詔策辨論之  
詞畢具以語觀之則右史記言尚書國語戰國策成敗  
興衰之說大備無不包也噫是可以為學者之端邪始

吾少時有路子者自贊為是書吾嘉而序其意而其書終莫能具卒俟宗直也故刪取其序繫於左以為西漢文類首紀殷周之前其文簡而野魏晉以降則濫而靡得其中者漢氏漢氏之東則既衰矣當文帝時始得賈生明儒術武帝尤好馬而公孫弘董仲舒司馬遷相如之徒作風雅並盛敷施天下自天子至公卿大夫士庶人咸通焉於是宣於詔策達於奏議諷於辭賦傳於歌謠由高帝迄於哀平王莽之誅四方之文章盖爛然矣

史臣班孟堅修其書拔其尤者充於簡冊則二百三十年間列辟之達道名臣之大範賢能之志業黔黎之風美列馬若乃合其英精離其變通論次其序位必俟學古者興行之唐興用文理貞元間文章特盛本之三代決於漢氏與之相準於是有能者取孟堅書類其文次其先後為四十卷

樂府古題序

元稹

詩訖於周離騷訖於楚是後詩之流為二十四名賦頌



銘贊文誅箴詩行詠吟題怨歎章篇操引謠謳歌曲詞  
調皆詩人六義之餘而作者之旨由操而下八名皆起  
於郊祭軍賓吉凶苦樂之際在音聲以度詞審調以節  
唱句度短長之數聲韻平上之差莫不由之準度而又  
區別其在琴瑟者為操引採民吐者為謳謠備曲度者  
總得謂之歌曲詞調斯皆由樂以定詞非選詞以配樂  
也由詩而下九名皆屬事而作雖題號不同而悉謂之  
為詩可也後之審樂者往往采取其詞度為歌曲蓋選

詞以配樂非由樂以定詞也而纂撰者由詩而下十七  
名盡編為樂府等題除鏡吹橫吹郊祀清商等詞在樂  
志者其餘木蘭仲卿四愁七哀之輩亦未必盡播於管  
弦明矣後之文人達樂者少不復如是配別但遇興紀  
題往往兼以句讀短長為歌詩之異劉補闕云樂府肇  
於漢魏按仲尼學文王操伯牙作水伶操齊牧犢作雉  
朝飛衛女作思歸引則不於漢魏而後始亦已明矣況  
自風雅至於樂流莫非諷興當時之事以貽後世之人

公襲古題唱和重複於文或有短長於義咸為贅賸尚  
不如寓意古題刺美見事猶有詩人引古以諷之義焉  
曹劉沈鮑之徒時得如此亦復稀少近代惟詩人杜甫  
悲陳陶哀江頭兵車麗人等凡所歌行率皆即事名篇  
無有倚傍余少時與友人白樂天李公垂輩謂是為當  
遂不復擬賦古題昨南梁州見進士劉猛李餘各賦古  
樂府詩數十百中一二章咸有新意予因選而和之其  
有雖用古題全無古義者若出門行不言離別將進酒

特書列女之類是也其或頗同古義全創新詞者則田家止述軍輸捉捕請先螻蟻之類是也劉李二子方將極意於斯文因為粗明古今歌詩同異之旨焉

崇豐二陵集禮後序

柳宗元

傳曰詩書執禮禮不執則不行自開元制禮大臣諱避去國恤章而山陵之禮遂無所執世之不學者乃妄取預凶事之說而大典闕焉由是累聖山陵皆撫拾殘缺附比倫類已乃斥去其後莫能徵永貞元和間天禍仍

邁自崇陵至於豐陵不能周歲司空杜公由太常相天下連為禮儀使擇其僚以備損益於是河東裴瑾以太常丞隴西辛秘以博士用焉內之則攢塗秘器象物之宜外之則復土斥土因山之制上則顧命典策與文物以授萬國下則制服節文頒憲則以示四方由其肅恭無不備具包并總統千載之盈縮羅絡旁午百氏之異同搜揚翦截而畢得其中顧問闕決而不悖於事議者以為司空得其人而邦典不墜裴氏乃悉取其所刊定及

奏復於上辨列於下聯百執事之儀以為宗豐二陵集  
禮藏於太常書閣君子以為愛禮而近古焉昔韋孟以  
詩禮傳楚而郊廟之制卒正於玄成鄭玄以箋注師漢  
而禪代之儀卒集於小同賈誼以經術起而嘉最好學  
盧植以儒學用而諶為祭法舊史咸以為榮今裴氏太  
尉公以禮匡義嗣侍中公以禮議封禪祠部公以禮成  
大事大理公以禮輔東宮而瑾也以禮奉二陵又能成  
書以充其闕其為愛禮近古也源遠乎哉瑾字豐叔其

伯仲咸以文學顯於世大理之兄正平節公以儀範成家道以文雅經邦政令相國郇公其宗子也郇公以孝友勤勞揚於家邦遊其門若聞韶護入其廟如至鄒魯恩溢乎九族禮儀於他門則豐叔之習禮也其出於孝悌歟成書也其本於忠敬歟由於家而達於邦國其榮於史氏也果矣

元和辨謗畧序

唐次

臣聞乾坤定而上下分矣至於播四時之候遂萬物之

宜在驗乎妖祥之二氣祥氣降則為豐為茂妖氣降則為沴為災君臣立而卑高隔矣至於處神明之奧詢獻納之辭在審乎邪正之二說正言勝則為忠為諫邪言勝則為讒為諛故詩云萋兮菲兮成是貝錦刺其組織之甚巧也語曰邪徑敗良田讒口亂善人惡其莠言之蠹政也蓋謂似信而詐似忠而非便便可以動心提掇可以亂聽豈止鵲鳩彫卉蕙苾惑珠者哉況立國立家自中徂外道偏則刑罰不中讒勝則忠孝靡彰逖覽前



聞緬思近古招賢容鯁遠佞嫉邪慮之則深防之未至  
伏惟睿聖文武皇帝陛下垂衣御寓化洽文明謨猷博  
訪於搢紳旌賁屢臻於巖穴尚復廣四目周四聰制治  
皆在於未萌作範將垂於不朽乃詔掌文之臣令狐楚  
等上自周漢下洎隋朝求史籍之忠賢罹讒謗之事迹  
叙瑕釁之本末紀誣詠之淺深編次指明勒成十卷昔  
虞舜有聖讒之命我皇修辨謗之書千古一心同垂至  
理將俟法宮退日昃之政別殿備乙夜之觀則聖慮先

辨謗何由興上天不言而人自信矣

張隱居莊子指要序

權德輿

今之時人有隱居張氏者治莊生內外雜篇以向郭舊  
注未盡采其旨乃為之訓釋猶懼學者之蕩於一端泥  
於一說又作三十三篇指要以明之蓋弘道以周物闡  
幽以致用內外相濟始終相發其文約其旨明纍如珠  
貫渙若氷釋既而以予嘗所蘄嚮俾叙而辨之為道之  
用也經天地該萬物內化者可以澤四海外化者可以

冥是非泝然順物內外偕化得其環中以應無窮古之  
善為道者如此泊乎性命目目之相軋也不勝於物則  
相刃相剮狗乎無涯氣耗乎名聲之域心闔於彼是之  
境陳露滑濬封執逆旅懼力不足而羣奔舛馳莊生哀  
其如是乃退廣柱下之說弛張變化未始離乎道用虛  
靜恬淡無為無本焉故其言后王撫世也則曰靜而聖  
動而王無為也而尊其言君子行道也則曰時命大行  
乎則返一無迹大窮乎則深根寧極窒乎欲則曰休影

息迹達乎生則曰外形委蛻其放言大觀也則齊彭殤  
一堯桀等周公於孩狙比大舜於豕虱或至大適以為  
累或至細乃牽乎用斯豈窮鄉一曲者所能通故有內  
外雜篇之異然則道之於物無不繇也行之者視其分  
隨其方而揭厲之則為家為邦為仁為智游之泳之日  
漸漬之化與心成不知所自則昧者皦躁者靜循之而  
愈照冥之而愈妙櫻寧懸解豈遠人哉隱居之意明此  
而已矣隱居名九垓別號渾淪子老於是學徧遊名山

無常居不粒食與土木鳥獸同其外而中明也如是向  
使與漆園同代如丘明受經於仲尼矣其顏成子南榮  
趺之徒歟予振衣於君實所辱命粗舉莊生之畧直書  
隱居之志以冠於篇

注孫子序

杜牧

兵者刑也刑者政事也為夫子之徒實仲由冉有之事  
也今者據按聽訟械繫罪人笞死於市者吏之所為也  
驅兵數萬擐其城郭係累其妻子斬其罪人亦吏之所

為也木索兵刃無異意也笞之與斬無異刑也小而易制用力少者木索笞也大而難制用力多者兵刃斬也俱期於除去惡民安活善人為國家者使教化通流無敢輒有不由我而自恣者其取吏也無他術也無異道也俱止於仁義忠信智勇嚴明也苟得其道一二者可以使之為小吏盡得其道者可以使之為大吏故用力少者其吏易得也功易見也用力多者其吏難得也功難就也止此而已無他術也無異道也自三代以降皆

由斯也子貢頌夫子之德曰文武之道未墜於地在人  
賢者識其大者遠者不賢者識其小者近者季孫問冉  
有曰子於戰學之乎性達之也對曰學之季孫曰事孔  
子惡乎學冉有曰即學於孔子孔子者大聖兼該文武  
並用適聞其戰法猶未之詳也復不知自何代何人分  
為二道曰文曰武離而俱行因使搢紳之士不敢言兵  
或恥言之苟有言者世以為癡暴異人人不比數嗚呼  
亡失根本斯最為甚周公相成王制禮作樂尊大儒術

有淮夷叛則出征之夫子相魯公會于夾谷曰有文事者必有武備叱辱齊侯伏不敢動是二大聖人豈不知兵乎周有齊太公秦有王翦兩漢有韓信趙充國耿弇虞詡段熲魏有司馬懿吳有周瑜蜀有諸葛武侯晉有羊祜杜公元凱梁有韋叡元魏有崔浩周有韋孝寬隋有楊素國朝有李靖李勣裴行儉郭元振如此人者當其一時其所出計畫皆考古校今奇秘長遠策先定於內功後成於外彼壯健輕死善擊刺者供其呼召指使



耳豈可知其所由來哉牧幼讀禮至於四郊多壘卿大夫之辱也謂其書真不虛說年十六時見盜起園二三千里係戮將相族誅刺史及其官屬屍塞城府山東崩壞殷殷馬聲振朝廷當其時使將兵行誅者則必壯健善擊刺者卿大夫行列進退一如常時笑歌嬉遊輒不為辱非當辱不辱以為山東亂事非我輩所當知牧自此謂幼所讀禮真妄人之言不足取信不足為教及年二十始讀尚書毛詩左傳國語十三代史書見其樹立

其國滅亡其國未始不由兵也主兵者聖賢材能多聞博識之士則必樹立其國也壯健擊刺不學之徒則必敗亡其國也然後信知為國家者兵最為大非賢卿大夫不可堪任其事苟有敗滅真卿大夫之辱信不虛也因求自古以兵著書列于後世可以教於後生者凡十數家且數萬言其孫武所著十三篇自武死後凡千歲將兵者有成者有敗者勘其事跡皆與武所著書一一相抵當猶印圈模刻一不差跌武之所論大約用仁義

使機權也武所著書凡十數萬言曹魏武帝削其繁剩  
筆其精切凡十三篇成為一編曹自為序因注解之曰  
吾讀兵書戰策多矣孫武深矣然其所為注解十不釋  
一此者蓋非曹不能盡注解也予尋魏志見曹自作兵  
書十餘萬言諸將征伐皆以新書從事從令者剋捷違  
教者負敗意曹自於新書中馳驟其說自成一家事業  
不欲隨孫武後盡解其書不然者曹豈不能邪今新書  
已亡不可復知予因取孫武書備其注曹之所注亦盡

存之分為上中下三卷後之人有讀武書予解者因而學之猶盤中走丸丸之走盤橫斜圓直計於臨時不可盡知其必可知者是知丸不能出於盤也議於廊廟之上兵形已成然後付之於將漢祖言指蹤者人也獲免者犬也此其是也彼為相者曰兵非吾事吾不當知君子曰叨居其位可也

般若心經贊序

張說

萬行起心心人之主三乘歸一一法之宗知心無所得

是真得見一無不通是玄通如來說五蘊皆空人本空也如來說諸法空相法亦空也知法照空見空捨法二者知見復非空邪是故定與慧俱空中法入此門者為明門行此路者為超路非夫行深波若者其孰能證於此乎秘書少監駙馬都尉滎陽鄭萬鈞深藝之士也學有傳癖書成草聖迺揮灑手翰鐫刻心經樹聖善之寶坊啟未來之華業佛以無依相而說法本不生我以無得心而傳今則無滅道存文字意齊天壤國老張說聞

而嘉焉讚揚佛事題之樂石

釋宗密禪源諸詮序

裴休

禪師集禪源諸詮為禪藏而都叙之休曰未曾有也自  
如來現世隨機立教菩薩間生據病指藥故一代時教  
開深淺之三門一真淨心演性相之別法馬龍二士皆  
弘調御之說而空性異宗能秀二師俱傳達摩之心而  
頓漸殊稟天台專依三觀牛頭無有一法江西舉體全  
真荷澤直指知見其他空有相破真妄相攻反奪順取

密指顯說故西域中夏其宗實繁良以病有千源藥生  
多品投機隨氣不得一同雖俱為證悟之門盡是正真  
之道然諸宗門下通少局多故數十年來師法益壞以  
承稟為戶牖各自開張以經論為干戈互相攻擊情隨  
函矢而遷變法逐人我以高低是非紛拏莫能辨析則  
向者世尊菩薩諸方教宗適足以起諍後人增煩惱病  
何利益之有哉圭峯大師久而歎曰吾丁此時不可以  
默矣於是以如來三種教義印禪宗三種法門融瓶盤

釵釧為一金攪酥酪醍醐為一味振綱領而舉者皆順  
據會要而來者同趨尚恐學者之難明也又復直示宗  
源本末真妄之和合空性之隱顯法義之差殊頓漸之  
同異遮表之迴互權實之深淺通局之是非莫不提耳  
而告之指掌而示之頓伸以吼之築和以誘之乳而藥  
之憂性命之夭傷也保而護之念水火之漂焚也挈而  
導之懼邪小之逆陷也揮而散之悲闢諍之牢固也大  
明不能破長夜之昏慈父不能保身後之子若吾師者



捧佛日而委曲迴照疑墮盡除順佛心而橫巨大悲窮  
劫蒙益是則世尊為闡教之主吾師為會教之人本末  
相符遠近相照可謂畢一代時教之能事矣或曰自如  
來滅後未嘗大都而通之今一旦違宗趣而不守廢闢  
防而不據無乃非秘藏密契之道乎答曰佛於法華經  
涅槃會中亦以融為一味但昧者不覺故涅槃經云迦  
葉菩薩曰諸佛有密語而無密藏世尊讚之曰如來之  
言開發顯露清淨無翳愚人不解謂之秘藏智者了達

則不名藏此其證也故王道興則外戶不閉而守在戎夷佛道備則諸法總持而防在外魔不當復執情據臂於其間也嗚呼後學者當取信於佛無取信於人當取證於本法無取證於末習能如是則可以報圭峯大師劬勞之德矣

荆潭唱和詩序

韓愈

從事有示愈以荆潭酬唱詩者愈既受以卒業因仰而言曰夫和平之音淡薄而愁思之聲要妙驩愉之辭難

工而窮苦之言易好也是故文章之作恒發於羈旅草  
野至若王公貴人氣得志滿非性能而好之則不暇以  
為今公開鎮蠻荆統郡惟九常侍楊公領湖之南攘地  
二千里德刑之政並勤爵祿之報兩崇乃能存志乎詩  
書寓辭乎詠訝往復循環有唱斯和搜奇扶怪雕鏤文  
字與韋布里閭顯頌專一之士較其毫釐分寸鏗鏘發  
金石幽眇感鬼神信所謂材全而能鉅者也兩府之從  
事與部屬之吏屬而和之苟在編者咸可觀也宜乎施

之樂章紀諸冊書從事曰子之言是也告於公書以為  
荆潭唱和詩序

聯句詩序

呂溫

河東柳茂直與余有藩楊之睦且道義相得也余兄弟  
志守拙默不交當世晨昏之外靖專一室顧我者惟茂  
直而已以為切磋蓋常事討論有宴息導志氣徒然起  
憤議時世予欲無言其或晴天曠景浩蕩多思永夜高  
月耿耿不寐或風露初曉恍若有得或煙雨如晦緬懷

所思不然何以節宣慘舒暢達情性其有易於詩乎乃  
因翰墨之餘琴酒之暇屬物命篇聯珠唱玉審韻諧律  
同聲相應研情比象造境皆會亦有衆壑合注寢為大  
川羣山出雲混成一氣朗宣五色微闡六義雖小道必  
有可觀其在茲矣茂直命余序述存以編簡俾後之觀  
者知吾黨所立之濫觴

崔吏部衛兵部同南縣尉日宿天長寺上方唱和

詩序

權德輿

易之同人曰文明以健中正而應故道同於內而氣相  
求情發於中而聲成文以觀以羣以比以興清河崔處  
仁河東衛從周於是有清秋仁祠往復十七韻之作初  
二賢皆以秀造分校秘府弘文之書貞元初同為渭南  
尉聯曹結綬相視莫逆處仁自府庭旋歸稅駕於斯國  
門勝槩康莊在下馳車徒而走聲利者此為咽喉外煩  
埃壅中孕閒曠晝懸清光夕湛虛明上方之鐘磬深夜  
之月露眇聽寂寞情靈感發投者報者無非瓊瑤如金

絲應和孔翠翔集盡在是矣厥後同為左右補闕從周以本官入為翰林學士處仁累以尚書郎知制誥既而處仁西垣即真從周復以外郎掌誥洎處仁遷小宗伯而從周即真俄掌貢舉實為之代元和三年秋處仁為吏部侍郎從周為兵部侍郎重九休澣聯鑣道舊永懷曩篇三紀于茲慮屋壁之隙壞詩文之磨滅不若刻勒片石之為堅且久也惟二賢大雅閎達人倫龜玉更為王楊迭為田蘇便蕃清近烜赫章大其於為霖為礪四

方之屬耳目久矣然則志氣之所舒英華之所摭其濫觴於此乎德興與二君子同為諫官同掌書命相繼典貢士分曹居中臺其間交代迭處不可具舉敢叨並者之數實悅同心之言追琢既具序夫本末亦二君子之志也

愚谿詩序

柳宗元

濯水之陽有谿焉東流入於瀟水或曰冉氏常居也故姓是谿為冉谿或曰可以染也名之以其能故謂之染



谿余以愚觸罪謫瀟水上愛是谿入二三里得其尤絕  
者家焉古有愚公谷今余家是谿而名莫能定土之居  
者猶斷斷然不可以不更也故更之為愚谿愚谿之上  
買小丘為愚丘自愚丘東北行六十步得泉焉又買居  
之為愚泉愚泉凡六穴皆出山下平地蓋上出也合流  
屈曲而南為愚溝遂負土累石塞其隘為愚池愚池之  
東為愚堂其南為愚庭池之中為愚島嘉木異石錯置  
皆山水之奇者以余故咸以愚辱焉夫水智者樂也今

是谿獨見辱於愚何哉蓋其流甚下不可以溉灌又峻  
急多坻石大舟不可入也幽邃淺狹蛟龍不屑不能興  
雲雨無以利世而適類於余然則雖辱而愚之可也甯  
武子邦無道則愚智而為愚者也顏子終日不違如愚  
睿而為愚者也皆不得為真愚今余遭有道而違於理  
悖於事故凡為愚者莫我若也夫然則天下莫能爭是  
谿余得專而名焉谿雖莫利於世而善鑒萬類清瑩秀  
徹鏘鳴金石能使愚者喜笑眷慕樂而不能去也余雖

不合於俗亦頗以文墨自慰漱滌萬物牢籠百態而無  
所避之以愚詞歌愚谿則茫然而不違昏然而同歸超  
鴻蒙混希夷寂寥而莫我知也於是作八愚詩紀於谿  
石上

唐文粹卷九十五

欽定四庫全書

唐文粹卷九十六

宋 姚鉉 編

序已

籍記附總一十七首

歌詩

小洞庭五太守讌籍

蘇源明

秋夜小洞庭離讌序

刻蘇公太守二文記

令狐楚

欽定四庫全書

唐文粹  
卷九十六

瑯琊溪述序

獨孤及

泛郎官湖詩序

李白

裴胄先宅讌集賦詩序

獨孤及

冬夜讌蕭十丈詩序

息夫牧

遊大林寺序

白居易

石鼎聯句詩序

韓愈

翫月詩序

歐陽詹

送陸歙州序

韓愈

送劉太真詩序

蕭穎士

送李愿歸盤谷序

韓愈

送疏言禪師太原取經詩序

李節

送小雞山樵人序

陸龜蒙

雲母泉詩序

李華

贈嵩山焦鍊師詩序

李白

小洞庭五太守讌籍

蘇源明

天寶十二載七月辛丑東平太守扶風蘇源明觴濮陽

太守清河崔公季重魯郡太守隴西李公蘭濟南太守  
太原田公琦濟陽太守隴西李公陵于回源亭既尊封  
壤乃密惠好前此濟陽以河堤之虞夫役之弊請南畧  
我宿及魯之中都宿人訟其不便源明請廢濟陽以平  
陰長清屬濟南廬東阿歸我陽穀隸濮陽役均三邦利  
倍二邑不可則分我壽西入濮陽東入濟陽魯之中都  
北入于我書貢閭閻旨下陳留陳留太守王公盛德帝  
俞美才人與自總連率實惟澄清命屬官湖城主簿王



予說會五太守于東平議縣乃不割郡亦仍舊已事修  
譙姑以為別若夫階抱孤嶠軒飛虔潭阻殘暑於重林  
速高秋於絕壑其盤何有牖鹿腴羊其俎何有蟠兔膾  
魴李下彫籠冰之以寒水瓜剖鉅刃巾之以疎紵禮交  
乎上當世高賢之相充樂動乎下前古中和之合作抑  
抑馬堂堂焉奚一人之富有而羣后之緝熙也司士庀  
舟以待司功投說以告徹饌更服陳羞絜罇自回源起  
廣泊左拂蠶尾右遺吾山倒岬岫於波際指梁岑於林

缺移搖敞豁暝眇虛曠太皞苗裔可寄住宿伯禹山川  
空流濟汶所遇多感祇牢為歡倬態目成以留客嫖容  
色授以勸酒繁絲疎管紛爾自會雅舞清唱倏然同引  
既醉源明以手版扣舷而歌曰小洞庭兮牢方舟風嫋  
嫋兮離平流牢方舟兮小洞庭雲微微兮連絕壘仍瀾  
壯兮緬以沒重巖轉兮超以忽馮夷舞兮護輕橈蛟龍  
佇兮落增湖泊中湖兮澹而閑並曲漱兮悵而還適予  
手兮非予期將解袂兮聚予思尚君子兮壽厥身承明

主兮憂斯人歌闋鳥獸聞之低昂而相鳴魚鼈聞之泐  
洄而或躍茲官吏安次而不易彼人庶樂業而不遷喜  
之哉樂之哉字渴泊曰小洞庭盛集五太守高譙云爾

秋夜小洞庭離讌序

源明從東平太守徵國子司業須昌外尉袁廣載酒于  
回源亭明日遂行及夜留讌會莊子若訥過歸菖相里  
子同禕過如魏陽穀管城青陽權衡二主簿在坐皆古  
人也徹饌新罇移方舟中有宿鼓有汶簧濟上嫺然能

歌者五六人共載止回源東柳門入小洞庭遲夷傍徨  
眇緬曠漾流商雜徵與長言者啾焉合引潛魚驚或躍  
宿鳥飛復下真嬉遊之擇耳源明歌曰浮漲湖兮莽條  
遙川后禮兮扈予橈橫增沃兮蓬仙延川后福兮易予  
脰月澄凝兮明空波星磊落兮耿秋河夜既良兮酒且  
多樂方作兮奈別何曲闌素子曰君公行當揮翰右垣  
宣止典胄米廩邪廣不敢受賜獨不念四三賢源明醉  
曰所不與吾子及四三賢同恐懼安樂有如秋水晨前

而歸及醒或說嚮之陳事源明局局然笑曰狂夫之言  
不足罪也乃志為序

刻蘇公太守二文記

令狐楚

太和五年春三月充海節度副使李員外虞致本府書  
幣修好于我卒事返命且以故太守蘇源明集中小洞  
庭讌籍及序二首見寄請予立一貞石識其故處云余  
為之考尋圖牒詢訪耆老自五六日至於旬時茫然曾  
不得回源亭渚泊依稀髣髴者從天寶十二載而下及

茲八十年源明有盛名於朝遺愛在鄆嘗與五太守會  
集讌遊之所形於文字罔若金玉若良二千石好事君  
子接武而來總不能恢張增飾之必當思人愛樹存為  
此州故事悲夫恩澤之外四紀有餘自蕩平而還三政  
相繼不銛鋒摩刃以戰鬪為務則長臂利爪而攫拾是  
謀視嘉山水好風月如越人之鬻瞽者之鑑非惟無用  
又從而仇之余以為不可使中行子之文無傳于此地  
乃於溪亭作金石刻引而記之亦李志也秋七月二十

七天平軍節度等使檢校尚書右僕射鄆州刺史兼  
御史大夫彭陽縣公令狐楚詞

瑯琊溪述序

獨孤及

隴西李幼卿字長夫以右庶子領滁州而滁人之飢者  
粒流者名乃至無訟以聽故居多暇日常寄傲此山之  
下因鑿石引泉醜其流以為溪溪左右建上下坊作禪  
堂琴臺以環之探異好古故也按圖經晉元帝之居瑯  
琊邸而為鎮東也嘗遊息是山厥跡猶存故長夫名溪

欽定四庫全書

唐文粹  
卷九十六

六

曰瑯琊他日賦八題於岸石及亦狀而述之是歲大厯  
六年歲次辛亥春三月丙午日述曰自有此山便有此  
泉不涸不刊幾萬斯年造物遺功若俟後賢天鍾靈奇  
公潤色之疏為迴溪削成崇臺山不過十仞意擬衡霍  
溪不袤數丈趣倖江海知足造適境不在大怪石皚皚  
涌湍潺潺洞壑無底雲興其間仲春氣至萬木華發亘  
陵被坂吐火噴雲公登山樂樂者畢同無小無大衆興  
從公公之舉觴酒酣氣振溪水為主而身為賓捨瑟詠



歌同風舞雩時時醉歸與夕鳥俱明月滿山朱轡徐驅  
石門松風聲類笙竽於戲人實弘道物不自美向微羊  
公遊漢之溪峴山寂寞千祀誰紀彼美新溪維公嗣之  
念茲疲人繫公其肥後之聆清風而嘆息者挹我於泉  
乎而已

泛沔州城南郎官湖詩序

詩附

李白

乾元歲秋八月白遷於夜郎遇故人尚書郎張謂出使  
夏口沔州牧杜公漢陽宰王公觴於江城之南湖樂天

金  
下之再平也方夜水月如練清光可掇張公以殊有勝  
槩四望超然乃顧白曰此湖古來賢豪遊者非一而枉  
踐佳境寂寥無聞夫子可為我標之嘉名以傳不朽白  
因舉酒酌水號之曰郎官湖亦由鄭圃之有僕射陂也  
席上文士輔翼岑靜以為知言乃命賦詩紀事刻石湖  
側將與大別山共相磨滅焉

張公多逸興共泛沔城隅當時明月好不減武昌都四  
座醉清光為歡古來無郎官愛此水因號郎官湖風流

若未減名共此山俱

仲春裴胄先宅讌集賦詩序

詩附

獨孤及

先是先清明一日右金吾倉曹薛華陳嘉猷醜清酤會  
河東裴興榮陽鄭哀河東獨孤及于署之公堂引滿舉  
白者自午及子促席于花陰賦詩于月下樂極不醉夜  
艾而罷後清明三日二三子春服既成思欲修好尋盟  
選勝卜晝裴侯是以再有投轄之會是會也鄭不至吾  
兄惠然而來堂有琴庭有篠芳草數步落花滿席中和

子冠烏紗帽相與箕踞喁喁傲睨相視稱觴乎其間趣  
在酒中判為酩酊之客家本秦也能無烏烏之聲其詩  
曰

上天垂光兮熙予以青春今日何日兮共此良辰與君  
觴濁醪而藉落英兮不知年華之相親蹇淹留以醉止  
孰云含意而未申歌數闋裴側弁慢罵曰百年歡會鮮  
於離別知開口大笑幾日及此日新無已今又成昔不  
紀而賦之如春風何其演為連珠以志此會

冬夜宴蕭十丈因餞殷郭二子西上詩序

息夫牧

志有之事三如一者惟君父師乎所以生之教之祿之  
生而不教不可立也教而不成不可祿也故師勉乎教  
而學者勵乎己已立學成而會友以講之是以伯魚趨  
庭曾參避席卜商投杖厥義於是乎在冬十有二月家  
君宰邑許下夫子問津賴上二賢將馳會府皆適茲土  
夜處狹室列坐有位尊卑儼如或捧觴上壽或摠衣請

並始敦師以閱禮終講信而修睦然後文飽於德義潤  
其身頃夫子升堂之後若盧賈劉尹之徒半紀間接武  
鳴躍實夫子訓之導之斯至也今殷郭二子天資才幹  
而加之鏃羽觀光王庭俯拾地芥其誰曰不然飛霜霑  
林寒氣總至月落西戶夜將向晨座隅謙謙畢醉溫克  
則知孔門宴餞異於他日二三子終身識之夫子以家  
君政事百里無事命門弟子賦鳴琴亦以釋仇離之怨  
馬小子不敏忝居門人之末敢不敬書其事

有琴斯鳴于宰之庭君子莅止其心孔平政既告成德  
以永貞鳴琴有術于頴之畔彼之才髦其年未冠聞詩  
聞禮斐兮璫璫鳴琴其怡于頴之湄二子翰飛言戾京  
師有鬱者桂載攀其枝琴既鳴矣宵既清矣烘燂有煒  
酒醴惟旨喟我寤歎吁其別矣

遊大林寺序

白居易

余與河南元集虛范陽張允中南陽張深之廣平宋郁  
安定梁必復范陽張時東林寺沙門法演智滿中堅利

辨道深道建神照雲臯息慈寂然凡十有七人自遺愛  
草堂歷東西二林抵化城憩峯頂登香爐峯宿大林寺  
大林窮遠人跡罕到環寺多清流蒼石短松瘦竹寺中  
惟板屋木器其僧皆海東人山高地深時節絕晚于時  
孟夏如正二月天梨桃始華澗草猶短人物風候與平  
地聚落不同初到恍然若別造一世界者因成口號絕  
句云人間四月芳菲盡山寺桃花始盛開長恨春歸無  
覓處不知轉入此中來既而周覽屋壁見蕭郎中存魏



郎中弘簡李補闕渤三人名姓文句因與集虛輩歎且  
曰此地實匡廬間第一境由驛路至山門曾無半日程  
自蕭魏李遊迄今垂二十年寂無繼來者嗟乎名利之  
誘人也如此時元和十二年四月九日白樂天序

石鼎聯句詩序

詩附

韓愈

元和十二年十二月四日衡山道士軒轅彌明自衡山  
來舊與劉師服進士衡湘中相識將過太白知師服在  
京夜抵其居宿有校書郎侯喜新有能詩聲夜與劉說

詩彌明在其側貌極醜白鬚黑面長頸而高結喉中又作楚語喜視之若無人彌明忽軒衣張眉指爐中石鼎謂喜曰子之能詩與我賦此乎劉往見衡湘間人說云年九十餘矣解捕逐鬼物拘囚蛟螭虎豹然不知其實能否也見其老頗貌敬之不知其有文也聞此說大喜即援筆而題其首兩句次傳於喜喜踴躍即綴其云云道士啞然笑曰子詩如是而已乎即袖手竦肩倚北牆坐謂劉曰吾不解世俗書弟子為我書吾句因高吟曰

龍頭縮菌蠢豕腹脹膨臍初不似經意詩旨有似譏喜  
二子相顧慙駭欲以多窮之即又為而傳喜喜思益苦  
務欲壓道士每營度欲出口吻聲鳴益悲操筆欲書將  
下復止竟亦不能奇也畢即傳道士道士即高踞大唱  
曰劉把筆吾詩云云其不用意益奇出不可附說語皆  
侵劉侯喜益忌之劉與侯皆已賦十餘韻彌明應之如  
響皆頽脫含譏諷夜盡三更二子思竭不能續因起謝  
曰尊師非世人也某伏矣願為弟子不敢更論詩道士

奮聲曰不然章不可以不成也又謂劉曰把筆來即又唱出四十字為八句書既止即讀讀畢謂二子曰章不已就乎二子齊應曰就矣道士曰此皆不足與語此寧為文耶吾就子所能而作耳非吾之所學於師而能者也吾所能者子皆不足以聞也獨文乎哉吾語亦不當聞矣吾閉口矣二子大懼皆起立牀下拜曰不敢他有問也願聞一言而已先生稱吾不解人間書解何書請問此而已道士寂然若無聞也累問不應二子不自得

即退就座道士倚牆睡鼻息如雷鳴二子怛然失色不敢喘斯須曙鼓鼙鼙二子亦因睡及覺日已上顧覓道士不見即問其童奴奴曰天且明道士起出門若將便旋然奴怪久不返即出到門覓無有也二子驚惋自責若有失者間遂詣余言不能識其何道士也嘗聞有隱君子彌明豈其人耶韓愈序

巧匠斲山骨剗中事煎烹

師服

直柄未當權塞口且吞

聲

喜

龍頭縮菌蠢承腹脹膨脹

彌明

外包乾鮮文中有

暗浪驚

師服

在冷足自安遭焚意彌貞

喜

謬當鼎鼐間

妄使水火爭

彌明

大似烈士膽圓如戰馬纓

師服

上比

香爐尖下與鏡面平

喜

秋瓜未落蒂凍芋強抽萌

彌明

一塊元氣閉細泉幽竇傾

師服

不值輸寫處馬知懷抱

清

喜方當紅鑪爇益見小器盈

彌明

睨睨無刃跡團團

類天成

師服

遙疑龜負圖出曝曉正晴

喜

旁有雙耳穿

上為孤髻撐

彌明

或訝短尾鉞又似無足鎬

師服

可惜

寒食毬擲此傍路坑

喜

何當出灰炮無計離瓶甕

彌明

陋質荷斟酌狹中愧提擎

師服

豈能煮仙藥但未污羊

羹

喜

形模婦女笑量度兒童輕

彌明

徒爾堅重性不過

升合盛

師服

仍似廢轂仰側見折軸橫

喜

時於蚯蚓竅

微作蒼蠅鳴

彌明

以茲黷溢愆實負任使誠

師服

常居

顧眄地敢有漏泄情

喜

寧依暖熱弊不與寒涼并

彌明

區區徒自效瑣瑣不足呈

師服

迴旋但兀兀開合唯鏗

鏗

喜

全勝瑚璉貴空有口傳名豈比俎豆古不為手所

搔磨礪去圭角浸潤著光明願君莫嘲諑此物方施行

四韻並編

明所作

翫月詩序

詩附

歐陽詹

月可翫翫月古也謝賦鮑詩眺之庭前亮之樓中皆翫也貞元十二年甌閩君子陳可封遊在秦寓於永崇里華陽觀予與鄉人安陽邵楚萇濟南林蘊潁川陳詡亦旅長安秋八月十五日夜詣陳之居修厥翫事月之為翫冬則繁霜太寒夏則蒸雲太熱雲蔽月霜侵人蔽與侵俱害乎翫秋之於時後夏先冬八月於秋季始孟終



十五於夜又月之中稽於天道則寒暑均取於月數則蟾兔圓沉埃塏不流大空悠悠嬋娟徘徊桂華上浮昇東林入西樓肌骨與之疎涼神器與之清冷四君子悅而相謂曰斯古人所以為翫也既得古人所翫之意宜襲古人所翫之作翫月詩云

八月三五夕舊嘉蟾兔光斯從古人好共下今宵堂素魄皎孤疑芳輝分四揚徘徊林上頭泛灩天中央皓露助流華輕飈佐浮涼清冷到肌骨潔白盈衣裳惜此苦

宜翫攬之非可將含情顧廣庭願勿沉西方

送陸歙州詩序

詩附

韓愈

貞元十八年二月十八日祠部員外郎陸君出刺歙州  
朝廷夙夜之賢都邑遊居之良齋浴涕洟咸以為不當  
去歙大州也刺史尊官也由郎官而往者前後相望也  
當今賦出於天下江南居十九宣使之所察歙為富州  
宰臣之所薦聞天子之所選用其不輕而重也較然矣  
如是而齋浴涕洟以為不當去者何也蓋陸君之道行

乎朝廷則天下望其賜刺一州則專而不能咸謂先一  
州而後天下豈吾君與吾相之心哉於是昌黎韓愈道  
願留者之心而泄其思作詩曰

我衣之華芳我佩之光芳陸君之去芳誰與翱翔芳斂  
此大惠施于一州今其去矣胡不為留我作此詩歌于  
達道無疾其驅天子有詔

送劉太真詩序

詩附

蕭穎士

記有之尊道成德嚴師其難哉故在三之禮極乎君親

而師也參焉無犯與隱義斯貫矣孔聖稱顏子有視余猶父歎其至歟今吾於太真也然乎爾且後進而余師者自賈邕盧真之後比歲舉進士登科名與實皆相望騰遷凡十數子其他自京畿太學踰于淮泗行東脩已上而未及門者亦云倍之余弗敏曷云當乎而莫之讓盖有來學微徃教蒙匪余求若之何其拒哉猗爾之所以求我之所以誨學乎文乎學也者非云微辯說撫文字以扇夫談端輒厥詞意其於識也必鄙而近矣所務

乎憲章典法膏腴德義而已文也者非云尚形似牽比  
類以局夫儷偶旅於奇靡其於言也必淺而乖矣所務  
乎敷揚雅訓彰宣事實而已衆之言文學者或不然於  
戲彼以我為僻爾以我為正同聲相求爾後我先安得  
而不問哉問而教教而從從而達欲辭師也得乎孔門  
四科吾是以竊其一矣然夫德行政事非學不言言而  
無文行之不逮豈相異哉四者一夫正而已矣故曰詩  
三百一言以蔽之曰思無邪不正之謂也吾嘗謂門弟

子有尹徵之學劉太真之文首其選焉今茲春連茹甲  
乙淑問休闡為時之冠浹旬有詔俾徵典校秘書且馳  
傳壘首領元戎書記之事四牡駢駢薄言旋歸聲動日

下浹於寰外而太真元昆前已甲科

太真凡太冲  
以去歲登科

未始

間歲翩其連舉謂予不信豈其然乎夏五月回棹京洛  
告歸江表岵兮屺兮歡既萃矣兄矣弟矣榮斯繼矣搢  
紳之徒習禮聞詩者僉曰劉氏二子可謂立乎身光乎  
親臨極致於人倫者矣上京餞別庭闈望歸從古以來

未之聞也予羈宦此都邑斯云舉彼吳之丘曾是昔遊  
心乎往矣有懷伊阻行矣風帆載飛載揚爾思不及黯  
然以泣先師孝悌謹信泛愛親仁餘力學文之訓爾其  
志之南條北固朱方舊里昔與太真初會於茲余之門  
人有柳并者前是一歲亦嘗覲茲地其請業也必始乎  
此焉并也有尹之敏劉之工其少且疾故莫之逮太真  
亦嘗曰何敢望并并與真難乎其相奪矣緬彼江陰京  
阜是臨言念二子從予於此爾云過之其可忘諸同是

餞者賦江有歸舟以寵夫嘉慶馬爾詩曰

江有歸舟亦亂其流之子言旋嘉名孔修揚于王庭允  
焯其休舟既歸止人亦榮止兄矣弟矣孝斯踐矣稱觴  
宴喜于岵于屺彼逝惟帆匪風不揚有彬伊文匪學不  
彰予其懷而勉爾無忘

送李愿歸盤谷序

韓愈

太行之陽有盤谷盤谷之間泉甘而土肥草木叢茂居  
民鮮少或曰謂其環兩山之間故曰盤或曰是谷也宅



幽而勢阻隱者之所盤旋友人李愿居之愿之言曰人之稱大丈夫者我知之矣利澤施於人名聲昭於時坐於廟堂進退百官而佐天子出令其在外則樹旗旄羅弓矢武夫前呵從者塞塗供給之人各執其物夾道而疾馳喜有賞怒有刑才俊滿前道古今而譽盛德入耳而不煩曲眉豐頰清聲而便體秀外而惠中飄輕裾翳長袖粉白黛綠者列屋而閒居妬寵而負恃爭妍而取憐大丈夫之遇知於主上用力於當世者之所為也吾

非惡此而逃之是有命焉不可幸而致也窮居而野處  
升高而望遠坐茂樹以終日濯清泉而自絜采於山美  
可茹釣於水鮮可食起居無時惟適所安與其譽於前  
孰若無毀於其後與其樂於身孰若無憂於其心車服  
不維刀鋸不加理亂不知黜陟不聞大丈夫不遇於時  
者之所為也我則行之伺候於公卿之門奔走於形勢  
之塗足將進而趨起口將言而囁嚅處污穢而不羞觸  
刑辟而誅戮僥倖於萬一老死而後止者其於為人賢

不肖何如也昌黎韓愈聞其言而壯之與之酒而為之  
歌曰盤之中維予之宮盤之土維予之稼盤之泉可濯  
可湘盤之阻誰爭予所窈而深廓其有容繚而曲如往  
而復嗟盤之樂兮樂且無央虎豹遠跡矣蛟龍遁藏鬼  
神守護兮呵禁不祥飲則食兮壽而康無不足矣奚所  
望膏吾車兮秣吾馬從予於盤兮終吾生以倘佯

送潭州道林疏言禪師太原取經詩序

李節

業儒之人喜排釋氏其論必曰禹湯文武周公孔子之  
代皆無有釋釋氏之興衰亂之所奉也宜一掃絕剗革  
之使不得滋釋氏源於漢流於晉瀾漫於宋魏齊梁陳  
隋唐孝和聖真之間論者之言粗矣抑能知其然未知  
其所以然者也吾請言之昔有一夫膚脂而色凝氣烈  
而神清未嘗謁醫未嘗禱鬼恬然保順罔有札瘥之患  
故善也即一夫不幸而有寒暑風濕之病背癢而足臂  
耳聾而目暝於是攻熨之術用焉襍禮之事紛焉是二

夫豈特相反耶蓋病與不病異勢也嗟乎三代之前世  
康矣三代之季世病矣三代之前禹湯文武德義著之  
周公孔子典教持之道風雖衰漸漬猶存詐不勝信惡  
知避善於是有擊壤之歌由庚之詩人人而樂也三代  
之季道風大衰力詐以覆信扇澆而散朴善以榮退惡  
以強用廢井田則豪窶相承矣貪封畧則攻戰并用矣  
務實帑則聚斂之臣昇矣務勝下則掊剋之吏貴矣上  
所以御其下者欺之下所以奉其上者苟之上下相仇

激為怨俗於是有汨羅之客有負石之夫人人愁怨也  
夫釋氏之教以清淨恬虛為禪定以柔謙退讓為忍辱  
故怨爭可得而息也以菲薄勤苦為修行以窮達壽夭  
為因果故賤陋可得而安也故其喻云必煩惱乃見佛  
性則其本衰代之風激之也夫衰代之風舉無可樂者  
也不有釋氏以救之尚安所寄心乎論者不責衰代之  
俗而尤釋氏之盛則是抱疾之夫而責其醫禱攻療者  
也徒知釋因衰代而生不知衰代須釋氏之救也何以

言之耶夫俗既病矣人既愁矣不由釋氏使安其分勇  
者將奮而思鬪智者將靜而思謀則阡陌之人將紛紛  
而羣起矣今釋氏一歸之分而不責於人故賢智偁朗  
之士皆息心焉其不能達此者愚人也惟上所役焉故離  
衰亂之俗可得而安賴此也若之何而翦去之哉論者  
不思釋氏扶世助化之大益而疾其雕鏤綵繪之小費  
吾故曰能知其然不知其所以然者也會昌季年武宗  
大翦釋氏巾其徒且數萬之民隸具其居容貌於土木

者沉諸水言詞於紙素者烈諸火分命御史乘驛走天下察敢隱匿者罪之由是天下名祠珍宇毀撤如掃天子建號之初雪釋氏之不可廢也詔徐復之而自湖已南遠人畏法不能酌朝廷之體前時焚撤書像殆無遺者故雖明命復許制立莫能得其書道林寺湘川之勝遊也有釋疏言警辯有謀獨曰太原府國家舊都多釋祠我聞其帥司空范陽公天下仁人我第往求購釋氏遺文以惠湘川之人宜其聽我而助成之矣即杖而北



遊既上謁軍門范陽公果諾之因四求散逸不成蘊帙  
者至釋祠不見焚而副剌者又命講丐以補繕闕漏者  
月未幾凡得釋經五千四十八卷以大中九年秋八月  
輦自河東而歸於湘焉噫釋氏之助世既言之矣向非  
我君洞鑒理源其何能復立之耶既立之且亡其書非  
有疏言識遠而誠堅孰克弘之耶吾喜疏言奉君之令  
演釋之宗不憚寒暑之勤德及遠人為叙其事且贈以  
詩詩曰湘川狺狺兮俗獷且狠利殺業偷兮吏莫之馴

繫釋氏兮易暴使仁釋何在兮釋在斯文湘水滔滔兮  
四望何已猿狖騰擎兮雲樹靡靡月沈浦兮煙暝山檣  
席卷兮櫓牀閑偃仰兮嘯詠鼓長波兮何時還湘川超  
忽兮落日皎皎松覆秋亭兮蘭披春畹上去兮幾千  
里何日同遊兮湘川水

送小雞山樵人序

陸龜蒙

小雞山在震澤西出吳胥門背朝日行四十里得野步  
市曰光福光福西五里得土山山土多石寡無大林木

率生小櫟撲檟皆薪材直吳之鑿此為助焉連延廣袤  
不一其主為書畫疆互以相授自家至麓凡二百弓東  
北倍高而加半焉余所置多少如此余家大小之口二  
十月費米十斛飯成理魚鮫輩十斛薪然後四時賓祭  
沐浴澣濯疾病湯藥糜粥在外歲入五千束足矣其掌  
而供事者顧及小雞之樵也乾符六年春弗雨夏支  
流將絕八月暴雨而巨觴可實而行之矣九月朔方置  
薪二百五十於門台而責之曰吾一夏來撤敗屋拔庭

草以炊雨之明日望爾來矣何數廡而至晚得非赭吾山而為汝之利耶老而欺如名惡何及笑曰吾年餘八十矣元和中嘗從吏部遊京師人言國家用兵帑金窖粟不足用當時江南之賦已重矣殆今盈六十年賦數倍於前不足之聲聞於天下得非專地者之欺甚乎吾有丈夫子五人諸孫亦有丁壯者自盜興已來百役皆在亡無所容又歲旱更害吾稼未即死不忍見兒孫寒餒之色雖盡售難山之木不足以濡吾家矧一二買名

為偷乎今予一煬竈不給而責吾之深吾將欲移其責  
于天下之守則吾死不恨矣余嘆之曰汝之言信也然  
不當發於予汝姑歸與之酒繼之以歌云

長其舩兮利其斧輸其薪兮勿予侮田予登兮穀予庾  
突晨煙兮蓬縷縷窻有明兮編有古飽而安兮惟編是  
伍時不用兮吾無撫汝

雲母泉詩序

詩附

李華

洞庭湖西玄石山俗謂之墨山山南有佛寺寺倚松嶺松

嶺下有雲母泉泉出石引流分渠周遍庭宇發源如乳  
漣末派如溥漿烹茶析蒸灌園漱齒皆用之大浸不盈  
大旱不耗自墨山西北至石門東南至東陵廣輪二十  
里盡生雲母牆階道路炯炯如列星井泉溪澗色皆純  
白鄉人多壽考無癰疽疥搔之疾華深樂之潁川陳公  
天寶中與華同為諫官公性與道合忽於權利方掛冠  
投簪顧華以名山之契乾元初公貶清江丞移武陵丞  
華貶杭州司功恩復左補闕上元中俱奉詔徵公自清

江至武陵道路多虞制書不至華泝江而西次於岳陽  
江山延望日夕相顧屬思與高賢共飲雲母之泉躬耕  
墨山之下敢違朝命以徇私欲秋風露寒洞庭微波一  
聞猿聲不覺涕下沉支離多病年齒始衰願餌藥扶壽  
以究無生之學事乖志負火爇予心寄懷此篇亦以書  
公之志也

晨登玄石嶺嶺上寒松聲朗日風雨霽高秋天地清山  
門開古寺石竇含純精洞澈淨金界黃緣流玉英澤樂

滋畦茂氣染茶甌  
馨飲液盡眉壽食和皆體平瓊漿駐  
容髮甘露瑩心靈  
岱谷謝巧妙匡山徒有名願言構蓬  
華荷鍾引泠泠訪道出人世招賢依福庭此心不能已  
寤寐見吾兄曾結潁陽契窮年無所成東西同放逐  
虵豕尚縱橫江漢阻攜手天涯萬里情恩光起憔悴西上  
謁承明秋色變江樹相思紛以盈猿啼巴丘戌月上武  
陵城共恨川路永無由會友生雲泉不可忘何日遂躬

耕



贈嵩山焦鍊師詩序

詩附

李白

嵩丘有神人焦鍊師者不知何許婦人也又云生於齊  
梁時其年貌可稱五六十常胎息絕穀居無室廬遊行  
若飛倏忽萬里世或傳其入東海登蓬萊竟亦不能測  
其往也余訪道少室盡登三十六峯間風有奇灑翰遙  
贈云

二室倚碧天三花明綠煙中有蓬來客宛疑麻姑仙道  
在諠莫染跡高想已遷時餐金娥藥屢讀青苔篇八極

恣遊憩九垓長周旋下瓢酌潁水舞鶴來伊川遂歸空  
山上獨拂秋霞眠蘿月掛朝鏡松風鳴夜絃潛光隱嵩  
丘鍊魄棲霞幄霓裳何歲蕤羽駕轉綿邈願同西王母  
下顧東方朔紫書儻可傳銘骨誓相學

唐文粹卷九十六

欽定四庫全書

唐文粹卷九十七

宋 姚鉉 編

序庾 總十八首

錫宴三

丞相少傅拜職天子作三傑之詩以命宴序

蘇晉

季春下旬詔宴薛王山池序

張說

集賢殿書院奉勅送學士張說上賜宴序

張九齡

讌集十五

泉州席史君讌秀才於東湖亭序

歐陽詹

暮春太師左右丞相諸公於韋公逍遙谷讌

集序

王維

蕭尚書拜命路尚書就林亭讌集序

潘炎

讌集韋庶子宅序

顧況

蓬池禊飲序

蕭穎士

兩省遺補讌韋司戶南亭序

王維

江陵陸侍御宅讌集觀張員外畫松石序

符載

魯山令胃讌寮吏序

歐陽詹

始得西山讌遊序

柳宗元

清明日南皮泛舟序

蕭穎士

夏日諸從弟登汝州龍興閣序

李白

春日讌諸從弟桃園序

遊雲門序

梁肅

序飲

柳宗元

序白

舒元興

丞相少傅拜職天子作三傑之詩以命宴序

蘇晉

惟聖寶賢以齊皇極有若左丞相燕國公右丞相廣平  
公太子少傅安陽侯皆生人碩德皇國元老道著廊廟  
績宣華戎由是懋其成功錫以元吉咨日於朔擇時於  
秋俾對命王庭受職公府見羣屬揖庶寮禮官辨章掌

舍陳次工備餼饗獻蒸六卿拜下以成儀三事自天而  
來賀秩秩賓序暉暉旅疇玉緯垂文南風和雅頌之變  
金漿降醴雲天光飫酌之宜宰德貴和盡莊敬具瞻之  
範羣情回洽預周旋宴語之懽方將一心天工戮力帝  
載寢黑山之柝苞青海之戈雲雨賢才水火救粟日詠  
魚藻歲陳由庚頤殷趙之年留魯陽之景爰命在宴乃  
賡載歌

季春下旬詔宴薛王山池序

張說

有生之性萬殊無方之盛一節陽和而動植暢春滿而  
臯壤悅后皇所以發時令布新慶二南邁周召之風百  
辟形金石之詠者也碧流日暖南山雪殘首獻之浹辰  
暮春之提日帝京形勝借上林而入遊咸里池臺就脩  
竹而開宴泉調御府味給天厨仙倡宿樂中貴督酒太  
平佳事前史未書大矣哉一德日新九功惟叙運璿樞  
而均四氣握金鏡而靜萬方堯舜湯文不違顏於咫尺  
夔龍伊呂共接手於朝廷不可見而見焉不可聞而聞



馬豈深恩勝殘去殺累百年之至仁推厯按圖啟千齡  
之昌運河清難得人代幾何擊壤之懽良有以也此則  
青門上路朱邱平臺城烟屢起而泊山野風時來而過  
水春將悵別愛落花之灑途夏如欣會玩峯雲之映沼  
爾其列筵授几分曹設幕艇送江鳧舩迎海鶴魚龍九  
劍曼延揮霍鸞鳳鳴簫鼓作申錫開於百甕慈心出於  
三爵炮炙熏林塘醪醴厭邱壑抃急管於無筭醉湛恩  
以取樂羣公賦詩俾僕題序長卿痛渴覺含毫之轉遲

子雲壯夫見雕蟲之都廢敢憚鄙詞之訥澁恐貽盛集之蕪穢云爾

集賢殿書院奉勅送學士張說上賜讌序

張九齡

集賢殿者本集仙殿也上惟睿作聖而猶垂意好學用相必本於經術圖王亦始於師臣及乎鴻生碩儒博聞多識之士自開元肇建以迄於今大用徵集煥乎廣內而聽政餘暇式讌在茲忠臣嘉賓得盡心之所聰明文思

有光被之德故下以道親上亦懽甚即於御座爰發德音以為候彼神人事雖千載傳於方士言固不經遂改為集賢去華務實且有後命增其學秩是以集賢之庭更為論思之室矣中書令燕國公外弼庶績以奉沃心之謀內講六經以成潤色之業故得出入華殿師長翰林惟帝用臧固天所賴拜命之日荷寵有加降聖酒之疊頒御厨之膳食以樂侑人思德飽時則有侍中安陽公等承恩預焉學士右散騎常侍東海公等攝職在焉

或稷高大賢淵雲諸彦文王多士周室以寧武帝得人  
漢家為盛而高視前古獨不在於今乎咸可賦詩以光  
鴻烈

泉州席史君宴邑中赴舉秀才於東湖亭序

歐陽詹

貢士有宴我牧席公新禮也貞元癸酉歲邑有秀士八  
人公將薦之於闕下古者相覲相祖有享有宴享以昭恭儉  
宴以示慈惠二典為用鮮或克兼諸侯升俊造於天子

遣之日惟行鄉飲酒之禮則享禮也載肉玄酒莫飲莫  
食公念肉不使食則仁不下泔酒不使飲則懼不上交  
方欲激邦俗於流醕致王人於德行而賢者仁未伊浹  
才者歡未我交其若蚩蚩何秋七月與八人者鄉飲之  
禮既修乃加之以宴餼移已膳醴出家醕求絲桐匏竹  
以將之選華軒勝景以光之後一日遂有東湖亭之會  
公削桑梓之禮執賓主之儀揖讓升堂雍容就筵樂遍  
作而情性不流爵無筭而儀形有肅鏘鏘焉濟濟焉於

是老幼來窺盡室盈岐非其親懿則其閭里皆內頌而  
選善焉於戲行其教不必耳提而口授移其風不必門  
扇而戶吹公斯宴則風移教行其間矣真盡心竭誠奉  
主化民之宰也烟景未暮酒德俱飽有逡巡避位而言  
曰夫詩者有以美盛德之形容君侯因片善附小能迴  
一邑之心成一邑之行昭吾人恭儉於嘉享示吾人慈  
惠於清宴迴人心成人行周孔之才也昭恭儉示慈惠  
管晏之賢也不有歌詠其如六義何是日人有甘棠類

宮之什客有天水姜閔河東裴叅和潁川陳詡邑人濟陽蔡沼佐贊盛事亦獻雅章小子公之毗幸鼓微聲先八人者鳴捧豆伺徹時在公之側觀衆君子之作遂作卜商之後書其旨

暮春太師左右丞相諸公於韋公逍遙谷讌集序

王維

山有姑射人蓋方外海有蓬瀛地非宇下逍遙谷天都近者王官有之不廢大倫存乎小隱跡崆峒而身拖朱

紱朝承明而暮宿青霤故可尚也先天之君俾人在宥  
歡心格于上帝喜氣降為陽春時則有若太子太師徐  
國公左丞相始興公少師宜陽公少保崔公特進鄧公  
吏部尚書武都公禮部尚書杜公賓客王公黼衣方領  
垂鐔珥筆詔有不名命無下拜熙天上者坐而論道掌  
邦典者官司其方相與察天地之和人神之泰聽於朝  
則雅頌矣問於野則賡歌矣乃曰猗哉至理之代也吾  
徒可以酒合讌樂考擊鐘鼓退於彤庭撰辰擇地右班



劍驂六駟畫輪載轂羽幢先路以詣夫逍遙谷焉神臯  
藉其綠草驪山啓於朱戶渭之美竹魯之嘉樹雲出於  
棟水環其室灞陵下連乎葉地新豐半入於家林館層  
巔檻側逕師古節儉惟新丹堊巖谷先曙羲和不能信  
其時芳卉後春句芒不能一其令桃逕窈窕蘅臯超忽  
驂御延佇於叢薄珮玉昇降於蒼翠於是外僕告火獸  
人獻鮮罇以大鼎烹用五鼎木器擁腫即天姿以為飾  
沼毛蘋蘩在山羞而可薦伶人在位曼姬始穀齊瑟懷

慨於右座趙舞徘徊於白雲袞冕松風珠翠烟露日在  
蒙汜羣山夕嵐猶且濯纓清歌據梧高詠與松喬為伍  
是義皇上人且三代之後而其君帝舜九服之內而其  
俗華胥上客則冠冕巢由主人則兄弟元凱合是四美  
同乎一時廢而不書罪在司禮竊思楚傳常詣茅堂之居  
仰謝右軍忽序蘭亭之事蓋不獲命豈曰能賢

蕭尚書拜命路尚書就林亭宴集序

潘炎

文昌貴臣新受厥服再拜稽首對揚休命逶迤而退則  
展慶賀之禮下舍之閑則懷宴語之好所以昵僚友宣  
寵光敵者易親懽焉而至是以蕭公膺納言之職路公  
徵賀遷之會泊冢宰司寇作者三人國老如埴篲之和  
陽春屬星鳥之序欣榮相合辰當美景形制所選地從  
主人窮土木之幽荒尋柏亭之奇構賓主有禮旨酒以  
柔之清言以發之庖盈而不侈筵肆而不雜狎而不黷  
酣而不流有太平君子之光是可久賢人之德風調日

暖烟靄無陰松茂草滋泉石通氣鶯出幽而初嚙花含  
愁而將歸外物獻美中懷有融高興格干丹霄餘恩垂  
乎清晝四座相顧請予所尊悅題賦詩無忘盛集

集韋庶子宅序

顧況

昔雒下鄴中蘭亭峴首文雅之盛風流之事蓋一方耳  
今席有芳樽庭有嘉木飲酒賦詩皆大國聖朝羣龍振  
鷺握蘭佩玉者也在古其有陋乎在今其有榮乎終讌  
一夕寄懷千載是時也暮春駘蕩孟夏恢台之交耳

蓬池禊飲序

蕭穎士

禊逸禮也鄭風有之蓋取諸勾萌發達陽景敷煦握芳  
蘭臨清川乘和蠲絜用儆介祉厥義存矣晉氏中朝始  
參燕胥之樂江右宋齊又間以文詠風流遂遠鬱為盛  
集焉若夫華林曲水萬乘之降也蘭亭激湍專城之踐  
也而方伯之懽未始前聞以俟乎今辰粵天寶乙未暮  
春三月河南連帥領陳留守李公以政成務簡方國多  
暇率府郡佐吏二三賓客悵飲於蓬池備祓除之禮也

梁有蓬池上矣前迄潁右匯鄆邑渺瀰淪連盪日澄  
天舟楫是臨泛波景從其左則遙原縈屬崇岡傑竦嘉  
卉異芳雜樹連青即為臺亭登眺斯在爾乃郡曹頒錫  
以給費縣吏領徒而脩頓先夕以定議詰朝而集事是  
日方收乃擁車徒曳旌旆外出乎北牖辰濟乎南川匪  
疾匪閑翼翼闐闐以稅駕於東焉然後降春流颺綵舟  
羽觴芳羞緩舞清謳援青蘋駭紫鱗迴環中汀緬望南  
津飫於已酣於未歌樂只賦既醉坐闕而靡怠日入而

未闕陶陶乎有以表勝境佳辰之具美名公好事之厚  
意下客不敏聞於前載曰夫德洽禮成則詠歌繫之梁  
故魏也詩皆賦詩志焉

洛陽鄭少府與兩省遺補讌韋司戶南亭序

王維

惟帝克辟惟股肱克左右庶績允釐有司多暇舉無違  
德孰獻其可雖列侍丹陛而罕伏青蒲攄懷致館灞陵  
南望曲江左轉登一級而鄠社如近盡三休而天地始

大凝氣向晦蒼蒼寒木式與汝歌多酌我酒墨客既序  
親當獸炭膳夫交馳屢奏鮮食夫含德之厚與時皆化  
拂衣而放則野人於小隱之中束帶而朝則君子於大  
夫之後何軌轍一境是非外物哉且騎有羈勒徒有次  
舍可以永日可以繼夜客非詩人之徒歟奚其嘿矣

江陵陸侍御宅讌集觀張員外畫松石序

符載

六虛有精純美粹之氣其注人也為太和為聰明為英



才為絕藝自肇有生人至於吾儕不得則已得之必騰  
凌負絕獨立今古用雖小大其神一貫尚書祠部郎張  
藻字文通丹青之下抱不世絕傳之妙則天地之秀鍾  
聚於張之一端也耶初公盛名赫然居長安中好事者  
卿相大臣既迫精誠乃持權衡尺度之跡輸在貴室他  
人不得誣妄而覩者也居無何謫官為武陵郡司馬官  
閒無事從容大府士君子由是往往獲其寶焉荊州從  
事監察御史陸澧字深源洎令第曰灞曰潤曰淮皆以

丈行穎耀當世故含藻蘊奇之士多遊其門焉秋七月  
深源陳讌宇下華軒沉沉樽俎靜嘉庭篁霽景踈爽可  
愛公天縱之思歛有所詣暴請霜素願撫奇蹤主人奮  
裾嗚呼相和是時座客聲聞士凡二十四人在其左右  
皆岑立注視而觀之員外居中箕坐鼓氣神機始發其  
駭人也若流電激空驚颺戾天摧挫幹掣撓霍瞥列毫  
飛黑噴捩掌如裂離合愴恍忽生怪狀及其終也則松  
鱗斂石巉巖水湛湛雲窈眇投筆而起為之四顧若雷

雨之澄霽見萬物之情性觀夫張公之藝非畫也真道也當其有事已知夫遺去機巧意冥玄化而物在靈府不在耳目故得於心應於手孤姿絕狀觸毫而出氣交沖漠與神為徒若忖短長於隘度筭妍蚩於陋目凝觚舐墨依違良久乃繪物之贅疣也寧置於齒牙間哉於戲由基之弧矢造父之車馬內史之筆札員外之松石使其術可授雖執鞭之賤吾亦師之如不可求從吾所學則知夫道精藝極當得之於玄悟不得之於糟粕衆

君子以為是事也是會也雖蘭亭金谷不能尚此或闕  
歌頌取羞前人命鄙夫首敘諸公得揮其宏思耳

魯山令李胄三月三日宴僚吏序

歐陽詹

三月三日有酒食出於野曰禊飲古俗也有唐今上御  
宇之九年年定三節一以二月一日曰中和取九月九  
日曰重陽次取此日之禊飲賜羣臣大宴登高臨川與  
時所宜洎四方有土之君亦得自晏其僚屬貞元十二

年季春月既魄一日則其日也臨汝魯山令趙郡李曹  
恭國令宴於縣南渙濱先宴曰夫宴者古所以示慈惠  
而期合懽者也國家錫以斯宴者情亦古情焉況食在  
充腸不在充目酒在成禮不在溺神歌發其所和自舞發  
其所自樂窮八珍竭千鍾彊發揚課絲竹則有勞有逸  
豈合歡之意歟於是首設一席肉一肩酒一壺命自天  
子命為佐者次一席酒肉亦如之命自己命以為吏者  
次一席酒肉亦如之命鄉閭許以耆年有德者肉既飽

酒既醉因化育之宿洽有歌謠者進有蹈舞者作皆誠  
乎中章乎形容婆娑慷慨與習而為者不類然後漁者  
請以其舟農者請以其器圃者請以其畜弋者請以其  
鮮啐濁膏漉浮泛漪瀾風恬日和川晴野媚以熙以恬  
萬心一之至義之門大順之家父兄弟一族一堂之  
中不能過也非仁德淳化其孰能至於是耶旅遊之子  
實窺盛事茲宴也雖溥於天下百里不同風雨恐他邑  
之景物此辰不得似公之邑也一方不同教化恐他邑

之懽樂此辰不得似公之邑也故叙之

始得西山譙遊序

柳宗元

自余為僇人居是州恒惴惴其隙也則施施而行漫漫而遊日與其徒上高山入深林窮迴溪幽泉怪石無處不到到則披草而坐傾壺而醉醉則更相枕以卧意有所極夢亦同趣覺而起起而歸以為凡是州之山有異態者皆我有也而未始知西山之怪特今年九月二十八日因坐法華西亭望西山始指異之遂命僕人過湘

江緣冉溪斫榛莽焚茅茨窮山之高而止攀援而登箕  
踞而遨則凡數州之土壤皆在衽席之下其高下之勢  
呀然窪然若垤若穴尺寸千里攢蹙累積莫得遯隱索  
青繚白外與天際四望如一然後知是山之特出不與  
培塿為類悠悠乎將灝氣以俱而莫得其涯洋洋乎與  
造物為遊而不知其所窮引觴滿酌頽然就醉不知日  
之入蒼然暮色自遠而至至無所見而猶不欲歸心凝  
神釋與萬化冥合然後知吾嚮之未始遊遊於是乎始



故為之序以志是歲元和四年也

清明日南皮泛舟序

蕭穎士

昔建安中魏文為王太子與朋友諸彥有南皮之遊颶  
鳴葭浮甘瓜清泉薈淪千古一色此城隅託勝之舊也  
由小而方大則貴賤之懼可齊以今而喻古則風流之  
事不易矧乃日清明時升平毗庶阜海濱之利謳吟動  
齊右之曲亦明代一方之樂也邑宰東海徐君洎英僚  
二三皆人傑秀出吏能高視郊驛繼當時之懼豪梁重

莊叟之興相與矯翠帟騰清波紅粧屢舞綠醕徐進管  
絲迎風以響亮士女環岸而攢雜可以娛聖澤表人和  
也層城景移碧潭陰起蕩暄妍之氣色縱魚鳥之游泳  
其思夫關塞崇萃昆池清泠關河千里帝京不見斯興  
情之極致也爰命墨客紀他鄉之勝事云爾

夏日諸從弟登汝州龍興閣序 李白

夫槿榮芳園蟬嘯珍木蓋紀乎南火之月也可以處臺  
榭居高明吾之友于順此意也遂卜精勝得乎龍興留

寶馬於門外步金梯於閣上漸出軒戶遐瞻雲天晴山  
翠遠而四合暮江碧流而一色屈指鄉路還疑夢中開  
襟危欄宛若空外嗚呼屈宋長逝無堪與言起予者誰  
得我二季當揮兩鳳藻飛乎鸞觴與白雲老兄俱莫負  
古人也

春夜宴諸從弟桃園序

夫天地者萬物之逆旅光陰者百代之過客而浮生若夢  
為歡幾何古人秉燭夜遊良有以也況陽春召我以烟

景大塊假我以文章會桃花之芳園序天倫之樂事羣  
季俊秀皆為惠連吾人詠歌獨慚康樂幽賞未已高談  
轉清開瓊筵以坐花飛羽觴而醉月不有佳作何伸雅  
懷如詩不成罰依金谷酒數

遊雲門序

梁肅

上德以汗漫為友無江海而閒其次則仁智相從山水  
為樂故合志同方賢者有柴桑之隱遊道同趣吾徒有  
雲門之會其造適一也先會一日沙門釋去誼命我友

相與探玉筍上會稽然後泝若耶過鳳林而南意欲脫  
人世之羈鞅窮林泉之遐奧於是捨舟清瀾反策閑原  
逌杳靄而歷嶇嶮入深翠以泛迴環遂至雲門觀其羣山  
疊翠泰望拔起五峰巉巖列壑沈沈上靡碧落旁湧金  
界其下則百泉會流蓄為澄潭涵虛鏡徹鳴瀨玉漱泠  
泠之聲與地籟唱和不待笙磬而五音迭作眺聽不足  
則凝思宴息恍然疑諸天樓觀列在咫尺庭衢之中別  
有日月既而動步真境靜聆法音合漆園一指之論詣

淨名無住之本萬里如洗百骸坐空視松喬為弱喪輕  
世界於橐籥蓋道由境深理自外獎故也昔之遠公紀  
廬山謝客題石門道流勝賞今古一貫曷可不賦貽雲  
山羞乃各為詩以誌斯會同乎道者有隴西李公受高  
陽齊霞舉約會未至亦請同賦此篇用廣夫游行之致  
云

序飲

柳宗元

買小丘一日鋤理二日洗滌遂置酒溪上嚮之為記所

謂牛馬之飲者離坐其背實觴而流之接取以飲乃置  
監史而令曰當飲者舉籌之十寸者三逆而投之能不  
洄於狀不止於坻不沈於底者過不飲而洄而沈而止  
者飲如籌之數既或投之則旋眩滑汨若舞若躍速者  
遲者去者住者衆皆據石注視懽抃以助其勢突然而  
逝乃得無事於是或一飲或再飲客有婁生菑南者其  
投之也一洄一止一沈獨三飲衆乃大笑懽甚余病瘡  
不可飲酒至是醉焉遂損益其令以窮日夜而不知歸

吾聞昔之飲酒者有揖讓酬酢百拜以為禮者有呌號  
屢舞如沸如羹以為極者有裸裎袒裼以為達者有資  
金石絲竹之樂以為和者有促數糺逖以為密者今則  
舉異是焉故捨百拜而禮無呌號而極不袒裼而達非  
金石而和去糺逖而密簡而同肆而恭衍衍而從容於  
以合山水之樂成君子之心宜作序飲以貽後人

序白

舒元與

今年子月月望長安重雪終日玉花攪空舞下散地予



與友生喜之因自所居南行百許步登崇岡上青龍寺  
門門高出絕寰埃宜寓目故抱今之日盡得雪境惟長  
安多高我不與並日既夕為寺僧道深所留遂引入堂  
中初夜有皓影入室室中人咸謂雪光射來復開門偶  
立見沍雲駮盡太虛真氣如帳碧玉有月一輪其大如  
盤色如銀凝照東方輾碧玉上征不見轍迹至乙夜帖  
懸天心予喜方雪而望舒復至乃與友生出大門恣視  
直前終南開千疊屏風張其一方東原接去與藍巖驪

巖犀瓊含光北朝天宮宮中有崇闕洪觀如玆珪疊璐  
出空橫虛此時定身周目謂六合八極作我虛室我我  
帝城白玉之京覺我五藏出濯清光中俗埃落地塗然  
寒膠瑩然鮮著徹入骨肉衆骸躍舉若生羽翎與仙人  
遊雲天汗漫之上沖然而不知其足猶蹋寺地身猶求  
世名二三子相視亦不知嚮之從何而來今之從何而  
遁不諱言不諱聲復根還始認得真性非天借靜象安  
能輔吾浩然之氣若是耶且冬之時凝沍有之矣若求

其上月下雪中零清霜如今夕或寥甚以其寥不易會  
而三者俱白故序之耳

唐文粹卷九十七